

傷寒論原序

余每覽越人入虢之診望齊侯之色未嘗不慨然歎其才
秀也怪當今居世之士曾不畱神醫藥精究方術上以療
君親之疾下以救貧賤之厄中以保身長全以養其生但
競逐榮勢企踵權豪孜孜汲汲惟名利是務崇飾其末忽棄其
本華其外而悴其內皮之不存毛將安附焉卒然遭邪風之氣
嬰非常之疾患及禍至而方震慄降志屈節欽望巫祝告
窮歸天束手受敗費百年之壽命持至貴之重器委付凡
醫恣其所措咄嗟嗚呼厥身已斃神明消滅變爲異物幽
潛重泉徒爲啼泣痛夫舉世昏迷莫能覺悟不惜其命若

是輕生彼何榮勢之云哉而進不能愛人知人退不能愛
身知己遇災值禍身居危地蒙蒙昧昧蠢若遊魂哀乎趨
世之士馳競浮華不固根本忘軀徇物危若冰谷至於是
也余宗族素多向餘二百建安紀年以來猶未十稔其死
亡者三分有二傷寒十居其七感往昔之淪喪傷橫天之
莫救乃勤求古訓博采眾方撰用素問九卷八十一難陰
陽大論臚藥錄并平脉辨症爲傷寒雜病論合十六卷雖
未能盡愈諸病庶可以見病知源若能尋余所集思過半
矣夫天布五行以運萬類人稟五常以有五藏經絡府俞
陰陽會通元冥幽微變化難極自非才高識妙豈能探其

理致哉上古有神農黃帝岐伯伯高雷公少俞少師仲文
中世有長桑扁鵲漢有公乘陽慶及倉公下此以往未之
聞也觀今之醫不念思求經旨以演其所知各承家技終
始順舊省疾問病務在口絡相對斯須便處湯藥按寸不
及尺握手不及足人迎趺陽三部不叅動數發息不滿五
十短期未知決診九候曾無髣髴明堂闕庭盡不見察所
謂窺管而已夫欲視死別生實爲難矣孔子云生而知之
者上學則亞之多聞博識知之次也余宿尙方術請事斯
語漢長沙太守南陽張機仲景撰

傷寒懸解自序

玉楸子滌慮玄覽游思壙垠空明研悟自負古今無雙甲寅之
歲以誤藥粗工委棄試帖考鏡靈蘭之秘詎讀仲景傷寒一言
不解遂乃博搜箋注傾瀝羣言縱觀近古傷寒之家數十百種
歲厯三秋猶爾茫若仰鑽莫從廢卷長噓魯鄙人之爲閉倪說
之弟子以不解解之何者固不可解也是殆亦不可解矣丁巳
仲春此心未已又復攤卷淫思日落神疲欹枕假寐時風靜月
白夜涼如水素影半牀清夢一肱華胥初回恍然解矣然後知
羣公著述荒浪無歸彼方且涉澤迷津披榛罔路何以引我於
康莊也吾聞適秦者立而至有車也適楚越者坐而至有舟也

今適秦之車且東其轅適越之舟或北其首雖風利而馬良終身不至矣然則古聖之書晦於訓詁者固多而後人之心誤於箋疏者不少也伊時擬欲作解年歲貿遷日月纏迫腹稿荒殘零落不追乾隆戊辰以事滯陽邱賓於劉氏荒齋北枕長河南踞崇山修樹迷空雜花布地愛此佳勝低徊留之乃有著作斐然之志於是掩關靜拱據梧凝思靈臺夜闌立鑰晨開遂使舊疑霧除宿障雲消蚌開珠露沙落金呈十載幽思三月而就起於春暮成於秋始時七月初三日也乃玄草甫成二毛生鬢感念此生於邑增懷昔蔡剛成欲以四十之年躍馬疾馳以就當世之業今春秋四十四年矣歲月不居時節如流不獲以未衰

之身小有建立方枯心於尺素之中殫精於寸管之內日薄途脩行自慨也然文信不遷呂覽弗著西伯非囚周易何傳是巴蜀乃不韋之樂地羗里爲文王之吉宅也僕也愛此兩書不敢續尾今日頓啟靈源成茲立構雖不能媲美前哲要亦可備一家之言也嗟乎仲景著書幾何年矣而千載塵封迄無解者今日之作縱爾敝精勞神不得已也

修身鼎錄

自序

一
望雲正廳

序

嗚呼醫學之壞至今日而極矣其鬻術者無論也卽有一二嗜古之士欲以涉獵方書研求醫理而繆種流傳往往守一先生之言以爲標準俗學茫昧千手一律殺人如麻不可殫紀有詒而難之者曰吾之學朱張劉李之學也吾之方固出自景岳八陣葉氏指南之所傳也然而不愈者有命焉非醫之咎也噫雖予亦以爲非醫之咎也何則彼其耳目錮蔽已深性靈汨沒日久雖欲自拔而不能亦大可哀也已余自束髮侍先父母疾卽喜繙閱醫書初師喻嘉言昌又師陳脩園念祖十年無所得道光戊申江西陳廣勇溥以玉楸黃先生醫書八種抄本相餉其

源不盡出自醫家而自唐以後談醫者莫之能及二千年不傳之絕學至是始得其真爰取四聖心源素靈微蘊鐫板行世一時醫風翕然丕變今湘鄉左君菊農繼明毅然以昌明醫學爲己任費緡錢一千有奇重刊其全部而以校讐之役相屬其嘉惠來學之心可謂勤矣夫菊農亦嘗從事於朱張劉李景岳八陣葉氏指南之說者而一旦棄之如遺何今之自命爲名醫者先入以爲主抵死而不寤讀此書曾不汗流夾背一發其羞惡是非之良不亦愼乎或曰朱張劉李古大家也張景岳葉天士亦近今之名手也斯與黃氏優劣惡從而辨之不知黃氏所傳者黃帝岐伯越人仲景四聖之心法彼則背而馳焉異端曲學

足以害道辭而闢之大聲疾呼吾黨之責也譬之儒家素問靈樞醫之六經也傷寒金匱醫之四子書也若黃氏之羽翼仲景方之朱子何多讓焉宗黃氏卽以宗仲景不宗仲景黃岐之法不立不宗黃氏仲景之法不明昌黎有言非三代兩漢之書不敢讀段師琵琶須不近樂器十年乃可授吾願世之好學深思者將後世一切非聖之書視之如洪水猛獸而一以仲景爲歸涵濡旣久漸漬而化焉若涉迷津臻彼岸導岐路騁康莊有不自旋其面目而捐棄故伎如菊農之勇者無是人也黃氏尙有周易懸解素問懸解靈樞懸解若干卷四庫全書提要存目中已著錄聞其昌邑裔孫弄藏甚密儻更有大力者搜而傳之於

以康濟羣生補拯劫運豈非醫林之盛事哉同治元年四月初
日湘潭後學歐陽兆熊序

傷寒懸解目錄

昌邑黃元御坤載者

卷首

仲景微旨

九章

卷一

脈法上篇

三十一章

卷二

脈法下篇

五十二章

卷三

太陽上篇

五十三章

太陽本病

中風 十五章

桂枝湯一

傷寒 九章

麻黃湯二

風寒雙感 四章

桂枝麻黃各半湯三

桂枝二越婢一湯四

桂枝二麻黃一湯五

大青龍證 二章
太陽入陽明去路

大青龍湯六

小青龍證

三章

太陽入太陰去路

小青龍湯七

白虎證

四章

太陽入陽明去路

白虎湯八

白虎加人參湯九

五苓散證

三章

太陽入陽明去路

五苓散十

茯苓甘草湯十一

文蛤散十二

二白散十三

抵當證 四章

桃核承氣湯十四

抵當湯十五

抵當丸十六

傳經證 六章

卷四

太陽中篇 五十六章

太陽壞病

太陽壞病入陽明 十五章